

साथण

आपणो ढूँढाड़ आपणी संस्करति

अक्टूम्बर सँ दिसम्बर 2023



संपादक :-

पूरण मल बैरवा अर रामजी लाल
बैरवा

सहयोगी :-

मुकेश कुमार योगी एवं कविता योगी

टाईपसेटिंग: पूरण मल बैरवा

सम्पर्क

निर्माण सोसायटी

वार्ड नं. 6, तक्रिया मस्जिद के पास, काली हवेली के पीछे,
देशवालियों का मोहल्ला, चाकसु, जयपुर, राजस्थान-303901
Ph.-01429-243997, 9982668204, 9887748510
Email- rajasthanlanguages@nirmaan.org.in
Web- www.dhundari.org.in, www.nirmaan.org.in

जीवा-अमरत कियॉ बणावाँ

1. एक एकड़ जमी के तोड़ी कम सँ कम 200 लीटर को बर्तन (लोया या सीमट की टंकी) लेल्यो। ऊँका पीन्दा के साँकड़े एक ठेकलो कर टूटी लगा द्यो। पहली टूटी के 9 इंच उपरें एक ओर ठेकलो कर और एक टूटी लगा द्यो। फेर दूसरी टूटी के 9 इंच उपरें एक ओर ठेकलो कर एक टूटी ओर लगा द्यो। अब इमै जीवा अमरत त्यार करो।
2. टंकी में 200 लीटर मीठो पाणी भरल्यो। (खासो पाणी मत लिज्यो)
3. 5 सँ 10 लीटर गाई को मूत मलादयो।
4. 10 किलो देसी गाई को गोबर मलार गोळ-गोळ हलावै।
5. 2 किलो गुड़ या 4 लीटर साँटा को रस मलावो।
6. 1 या 2 किलो बेसण या दाळ को चून मलादयो।
7. एक मुठी खेत की मेर या जंगळ का पोदा की जड़ा के चपकैडी गार ल्यार मलादयो।
8. यॉ सगळा नै 200 लीटर पाणी की टंकी में मलार घाडा घोळ ल्यो।
9. बोरी सँ ढकर 2 दन यानी 48 घण्टा तक छाया में मेलदयो। (चोमासा अर ऊन्दाळा में 48 घण्टा अर स्याळा में 4 दन यानी 96 घण्टा राँखणो छै)
10. रोजिना स्याम सुँवारैई लकड़ी का डंडा सँ एक मिनट तक गोळ-गोळ (घड़ी की सुई घूमै जियॉ) धीरै-धीरै हलावो।
11. ई टंकी नै बरखा का पाणी, तावड़ा, बाळकॉ अर टाण्डा सँ बचार राँखणो छै।
12. 7 सँ 12 दन के बीच में काम में लोवा सँ जादा काम करैलो। ई जीवा-अमरत नै बण्यॉ पाछै 15 दन तक काम ले सकै छै।
13. जी दन जीवा-अमरत देणो छै उके 24 घण्टा पहली सँ घोळवो बन्द करदयो। सगळा जीवाणू पीन्दा में भेळा हैज्याला। ऊँके ऊपरें जीवता जीवाणू तरता रहवैला। 24 घण्टा पाछै पीन्दा सँ 9 इंच ऊपरें की टूटी खोलर थोडो सोक पाणी नखाळ लो। बाद में ई पाणी नै 200 लीटर की दूसरी टंकी में घालर 180 लीटर पाणी भरदयो। अब थॉनै गुड़ बेसण घालवा की नुरत कोने ई पाणी सँ थे ओर जीवा-अमरत बणा सको छो।

जीवा-अमरत देबा को तरीको

- साक में पाणी देबा की टेम धोरा में या फेर चाठा (जीमै सँ खेत में पाणी जावै छै) में एक टूटी की टंकी या फेर एक पातो लेल्यो जीका पीन्दा में एक छोटो ठेकलो कर ऊँके एक टीटकी फोदयो जीसँ धोरा का पाणी में टोपो-टोपो पाणी पड़तो रहवैलो अर घुळतो रहवैलो।

1. कोठी सँ सीदो खेत में पाणी देवै ज्यॉ किसाना नै टंकी में सँ एक छोटो नळकी लगार ऊँ पाईप में जोड़दयो ज्यो कोठी में सँ नखयॉ छै, ताकि जीवा-अमरत सीदो क्यारी में जार पोदाँ की जड़ा में रस ज्यालो।



जीवा-अमरत

पराकरतीक खेती में जीवा-अमरत घणो काम करै छै। जीवा-अमरत कोई खाद कोनै यो तो पोधा नै बढाबा के तोड़ी छोटा-छोटा जीवा नै पोसण दे छै जिसँ साख चोखी है छै। अपनी साख नै नरोगी करबा अर जोरकी करबा के तोड़ी थॉ सगळा नै जीवा-अमरत बणार देणो चाईजे। आओ आपा ईनै बणाबा अर देबा का वारा में ओर जादा सीखॉ...।

जीवा-अमरत बणाबा की सामग्री

200 लिटर जीवा-अमरत बणाबा के तोड़ी ये सारी चीजाँ हैबो जरूरी छै।

- 10 किलो देसी गाई को गोबर
- 5-6 लीटर देसी गाई को मूत
- 2 किलो गुड़ या 4 लीटर साँटा को रस
- 2 किलो बेसण या दाळ को चून (चणा, चूँचा, मोठ, आरेड़, मूँग)
- 1 मुठी गार (पोदाँ की जड़ा के साँकड़े की गार)

देसी गाय
को गोबर



देसी गाय
को मूत



जीवा-
अमरत



बेसण/
दाळ को
चून



गुड़

गुड़ की जड़ा
की गार



देसी
गाय



जीवा-अमरत देबा को तरीको

- जीवा-अमरत एक मीना में 2 बार देणो चाईजे (सादा फसल में 200 सँ 400 लीटर अर बागवानी में 400 सँ 800 लीटर)



- खड़ी साख में फूँवारा सँ भी छड़क सको छो। पण बागवानी में सीदा जमी में पोदा की जड़ा में पटको जादा लाभ देवै छै।

मुहावरा

गुँठो दखावो।

अर्थ = समय पर इंकार कर देना।

वाक्य में प्रयोग :- बाबूलाल तो गोपी नै एन्टेम पै गुँठो दखा दियो।

गूलर को फूल हैवो।

अर्थ = दुर्लभ व्यक्ति या वस्तु।

वाक्य में प्रयोग :- कल्याण तो गूलर को फूल ही हैरयो।

कावताँ

- चोरी को धन मोरी मै।
अर्थ - हराम की कमाई बेकार जाती है।
- च्यार दन की चाँदनी, फेर अन्देरी राता।
अर्थ - अच्छे दिन कम ही आते है।
- छड़ूँदर का माथा में चमेली को तेल।
अर्थ - अयोग्य व्यक्ति को अच्छी चीज़ देना।
- छीकै कुण अर नाक कटाव कुण।
अर्थ - किसी के दोष का फल कोई दूसरा भोगे।